

आकाशवाणी

खास-खास खबरां:-

1. म्यांमा दे राष्ट्रपति ऊ मिन आऊं लाइन होरें प्रधानमंत्री नरेन्द्र मोदी होरें'गी भरोसा दोआया ऐ जे म्यांमा दी धरती दा इस्तेमाल भारत खिलाफ नैई होन दिता जाहग।
2. उद्योग ते बपार मंत्री पीयूष गोयल होरें आखेआ जे भारत ते अमरीका बशकार बपार समझौते दे पैहले गेड़ दे ज्यादातर बिंदुएं पर सहमति बनी गई ऐ। हून समझौते गी खीरी रूप दिता जा'रदा ऐ।
3. उत्तराखंड च चमौली जिला स्थित यूनेस्को विश्व धरोहर थाहर फुल्लें दी घाटी सैलानियें लेई खोली दिती गई ऐ।
4. 2026 दे एशियाई खेड्डें थमां पैहले 22 किशती चालकें गी टारगेट ओलंपिक पोडियम स्कीम डेवलपमेंट ग्रुप च शामिल कीता गेआ ऐ।
5. ते जपान च मर्दे दे U-18 हॉकी एशिया कप च कल भारती टीम नै पूल-ए दे मुकाबले च कोरिया गी U-1 कन्नै हराई दिता।

<><><><><><>

PM-Myanmar Talks

प्रधानमंत्री नरेन्द्र मोदी ते म्योमा दे राष्ट्रपति ऊ मिन आऊ लाइन होरें नमीं दिल्ली च बैठक लाई। इस बैठक च प्रधानमंत्री नरेन्द्र मोदी होरें'गी राष्ट्रपति होरें भरोसा दोआया जे भारत दे खिलाफ म्यांमा अपनी ज़िमी दा इस्तेमाल नैई होन देग। दौने नेताएं बशकार रक्षा- बपार- ऊर्जा ते सम्पर्क बदाने दे उपाएं पर विचार-विमर्श होआ। म्यांमा दे राष्ट्रपति होर 5 दिन दी भारत यात्रा पर न। गल्लबात मगरा सचिव विक्रम मिसरी होरें संवाददाताएं गी दस्सेआ जे म्यांमा दे राष्ट्रपति होरें भरोसा दोआया ऐ जे भारत दे सुरक्षा हितें खिलाफ म्यांमा दी धरती दा इस्तेमाल नैई होग। प्रधानमंत्री नरेन्द्र मोदी होरें म्यांमा दी संप्रभुता ते क्षेत्रीय आखंडता प्रति भारत दा समर्थन दोहराया। दौने मुखे बशकार मुख्त तौर पर बपार ते आर्थिक सरबंध- रक्षा ते सुरक्षा ते सीमा प्रबंधन- विकास सहयोग ते क्षेत्रीय स्थिति पर गल्लबात होई। दौने पक्खें बपार ते निवेश- सेहत- शिक्षा- ऊर्जा ते AI जनेई महत्वपूर्ण प्रोद्योगिकि च सहयोग बदाने पर विचार कीता।



Indo-US Trade Talks

उद्योग ते बपार मंत्री पीयूष गोयल होरें आखेआ ऐ जे भारत ते अमरीका बश्कार बपार समझौते दे पैहले गेड़ दे ज्यादातर बिंदुएं पर सहमति बनी गई ऐ। हुन समझौते गी खीरी रूप दिता जा'रदा ऐ। अमरीकी टीम गल्लबात आस्तै 4 जून तगर दिल्ली च ऐ। भारत आसेया वाणिज्य विभाग च अपर सचिव दर्पण जैन मुख्ख वार्ताकार न- जिसले के अमरीकी टीम दी अगुआई ब्रेंडन लिंच होर करा'रदे न। दौनें पक्खें 3 फरवरी गी समझौते दे पैहले गेड़ दी रुपरेखा घोशित कीती ही। रुपरेखा पर सहमति बनी जाने पर 7 फरवरी गी संयुक्त घोषणा पत्र जारी कीता गेआ हा। हून समझौते आस्तै कनूनी पक्ख तय कीता जाना ऐ।



Utrakhand -UNESCO

उत्तराखंड च चमोली जिला स्थित यूनेस्को विश्व धरोहर थाहर फुल्ले दी घाटी सैलानियें लेई खोली दिती गई ऐ। वन विभाग नै सैलानियें थमां घाटी दी समृद्ध जैव विविधता ते दुर्लभ वनस्पति संरक्षण च सहयोग दी अपील कीती ऐ। मौजूदा समें च घाटी च 3 सौ थमां मती फुल्ले दियां प्रजातियां ते दुर्लभ वनस्पतियां मौजूद न। एह 31 अक्टूबर तगर सैलानियें लेई खुल्ली दी रहोग।



BJP Prez-Party Meet

भारतीय जनता पार्टी अध्यक्ष Nitin Nabin होरें कल नमीं दिल्ली च पार्टी दे वरिष्ठ ओहदेदारें ते कारजकरताएं कन्नै बैठक कीती। पार्टी सांसद ते प्रवक्ता डाक्टर संबित पात्रा होरें पत्रकारें कन्नै गल्लबात च पिच्छले 12 बरें दौरान मोदी सरकार दी सेवा-संगठनात्मक विस्तार ते समाज दे बक्ख-बक्ख वर्गें तगर पार्टी दी पुज्ज बदाने दे जत्नें पर होए दे विचार-विमर्श दा ब्यौरा सांझा कीता। उ'नें आखेआ जे हर नागरिक पिच्छले 12 बरे च प्रधानमंत्री नरेन्द्र मोदी हुंदी अगुआई च बक्ख-बक्ख क्षेत्रें च होई दी प्रगति दा गवाह ऐ। पात्रा होरें आखेआ जे अज्ज भारतीय जनता पार्टी ते NDA सरकार गी मुख्ख दे 22 राज्यें ते केन्द्र शासित प्रदेशें दी सेवा दा मौका थहोआ ऐ।



Judges Oath

सुप्रीम कोर्ट दे 5में चुनाएं दे जज अज्ज ओहदे राजदारी दी सगंध लैडन। मुख् न्यायधीश सूर्यकांत उनें'गीं सगंध दौआडन। राष्ट्रपति द्रौपदी मुरमू होरें मुख् न्यायाधीश हुंदे कन्नै सलाह-मशवरा करने मगरा इनें जजे दी नियुक्ति कीती ऐ।



UP- Inquiry

उत्तर प्रदेश सरकार नै हमीरपुर जिले च बेतवा नदी पर निर्माणधीन पुल दे इक हिस्से दे ढेई पौने दी घटना दी जांच आस्तै 2 बक्ख-बक्ख उच्च स्तरीय जांच समीतियें दा गठन कीता ऐ। इस हादसे च 6 मज़दूरें दी मौत होई गई ही। हमीरपुर दे जिलाधिकारी अभिषेक गोयल होरें दस्सेआ जे जिला प्रशासन आसेया कायम 3 सदस्यीय जांच समीति दी अध्यक्षता अतिरिक्त जिला मैजिस्ट्रेट करा रदे न। जांच समीति घटना कन्नै जुड़े दे सारे प्रशासनिक- तकनीकी ते सरबंधी पैहलुएं दी व्यापक जांच करौग।



Tops- Rowers

2026 दे एशियाई खेड्डें थमां पैहले 22 नौका चालकें गी टारगेट ओलम्पिक पोडियम स्कीम डेवलपमेंट ग्रुप च शामिल कीता गेआ ऐ। युवा मामलें ते खेड्ड मंत्रालय नै आखेआ जे इनें खडारियें गी योजना च शामिल करने दा मकसद छड़ा तगमा जितने दी संभावनाएं पर ध्यान केन्द्रित करना नैई सगुआ बक्ख-बक्ख नौका श्रेणियें च सक्षम समूह तयार करना ऐ।



Hockey

जपान च मर्दे दी U-18 हॉकी एशिया कप च कल भारतीय टीम नै Pool-A दे मुकाबले च कोरिया गी 4-1 कन्नै हराई दिता। त्रिए ते 26में मिन्ट च कप्तान केतन कुशवाश होरें 2 शानदार गोल कीते ते भारतीय टीम शुरुआती 5 मिन्टें च गै अगगै निकली गई। भारत पूल-ए च जपान ते कोरिया दे कन्नै 6 अंके दी बरोबरी पर आई गेआ ऐ। पूल दी शीर्ष दो टीमां सेमीफाइनल च पुजडन। भारत दा अगला मुकाबला कल चीनी ताइपे कन्नै होग।



US Prez –Lebanon/Israel

अमरीका दे राष्ट्रपति डोनाल्ड ट्रम्प होंरें आखेआ ऐ जे इज़रायल ते हिज़बुल्ला संघर्ष रोकने पर सहत होई गे न। ट्रम्प होंरें दस्सेया जे उ'नें इज़रायल दे प्रधानमंत्री बेन्यामिन नेतन्याहू हुंदे कन्नै गल्लबात कीती ऐ ते बचोलियें दे राए हिज़बुल्ला कन्नै बी राबता कीता ऐ। ट्रम्प होंरें दस्सेआ जे हुन बेरुत आहली भेठा सेना नैई भेजी जा'रदी ऐ ते जेड़े सैनिक रस्ते च हे- उनें'गी वापस सद्दी लेता गेआ ऐ। हिज़बुल्ला नै आखेआ ऐ जे जेकर इज़रायल आसेया होने आहले हमले बंद हुंदे न तां ओ बी हमला नैई करोग।



Iran-US Ceasefire

ईरान नै चेतावनी दिती ऐ जे लेबनान च हिज्बुल्लाह पर इज़रायल दे हमले- अमरीका कन्नै उन्दे संघर्ष विराम गी प्रभावित करी सकदा ऐ। ईरान दे विदेश मंत्री अब्बास अरागची होंरें आखेआ जे अमरीका कन्नै होए दा समझौता साफ तौरा पर सारे मोर्चे पर संघर्ष विराम ऐ- जेदे च लेबनान बी शामिल ऐ। उ'नें गलाया जे कुसै इक मोर्चे पर इसदी खिलाफवर्जी पूरे संघर्ष विराम दा उल्लंघन मन्नेआ जाहग। एदे थमां पैहले इज़रायल दे प्रधानमंत्री नेतन्याहू होंरें आखेआ जे बेरुत दे दहियाह इलाके च आतंकवादी ठिकान गी निशाना बनाया जाहग।



ED -Properties Attached

प्रवर्तन निदेशालय -ED नै पंजाब दे रामनगर दे ज्ञान सागर एजूकेशन ते चैरिटेबल ट्रस्ट दी लगभग इक जहार 6 सौ करोड़ रपे दी 14 अचल सम्पत्तिएं गी रपे-पैसे दे हेर-फेर सरबन्धी मामले तैहत अस्थायी तौप पर जब्त कीता ऐ। एजेंसी नै दस्सेआ ऐ जे कम्पनी ते सरबन्धी संस्थाएं आसेआ संचालित सामूहिक निवेश योजना च बड्डे पैमाने पर धोखाधड़ी दी जांच दे सिलसिले च एह कारवाई कीती गई ऐ।



CBI- Reliance

केन्द्रीय जांच ब्यूरो नै रिलायन्स कम्युनिकेशन ग्रुप दे शीर्ष अधिकारी अमिताभ झुनझुनवाला गी बैंक धोखाधड़ी मामले च गिरफ्तार कीता ऐ। एजेंसी नै दस्सेआ ऐ जे

ओह रिलायंस कम्युनिकेशन ग्रुप दे ग्रुप मैनेजिंग डायरेक्टर हे ते कॉर्पोरेट फाइनेंस जनेह मामले गी नियंत्रित करदे हे। आरोप ऐ जे दौआर सरबन्धी पैसे दे गलत इस्तेमाल करी बैंकें गी अनुचित नुकसान होआ। एदे थमां पैहले सी.बी.आई नै एस.बी.आई थमां हासल शकैत दे आधार पर रिलायंस कम्युनिकेश लिमिटेड ते अनिल डी. अम्बानी खिलाफ एफ.आई.आर. दर्ज कीती ही- जेदे च उन्दे पर बैंक गी 2 जहार 929 करोड़ रपे थमां मते दा नुकसान पजाने दा आरोप लाया गेआ हा।



JK-Self Enumeration

मरदमशुमारी 2027 तैहत कल शुरु होए दे घरें-मकाने दी गिनत्री करने दी प्रकिया कोला पैहले लगभग 15एं दिनें धोड़ी चले दे ऑनलाईन आपू अपनी जानकारी दर्ज करने आहले Self Enumeration पोर्टल राएं रिकार्ड 6 लक्ख 67 जहार लोकें अपनी जानकारी दर्ज कीती ऐ। आकाशाणी दे जम्मू संवाददात नै जानकारी दिती ऐ कि इस बारे जानकारी सांझी करदे होई जम्मू-कश्मीर ते लद्दाख दे प्रधान मुख् जनगणना अधिकारी ते जनगणना प्रक्रिया दे निदेशक अमित शर्मा होरें दस्सेआ कि 2027 दी मरदमशुमारी तैहत सैल्फ इन्यूमरेशन च बन्धी-चढ़ियै हिस्सा लैने आहले केन्द्र शासत प्रदेशें च जम्मू-कश्मीर सब्भनें शा अग्गे ऐ- जिसले कि होरनें राज्यें गी बी जेकर मलाया जा तां जम्मू-कश्मीर 8में नम्बर पर ऐ।



JK –Search Operation

जम्मू-कश्मीर दे राजौरी जिले च आतंकवादियें दा पता लाने लेई सुरक्षाबलें आसेया शरुवली नां कन्नै चलाए जा’रदे बड्डे पैमाने पर सांझा तपाशी अभियान कल 10में दिन बी जारी रेहा। आतंकवादियें दे ठकान दा पता लाने लेई ते घने जंगले आले इलाकें च सुरक्षा गी मजबूत करने लेई सख्त जतन कीते जा’रदे न। फौज आसेया होरनी सुरक्षा सुरक्षा एजेंसियें कन्नै रलियै एह अभियान चलाया जा’ करदा ऐ। जारी इस अभियान दौरान व्हाई नाइट Corps दे GoC लैफ्टिनेंट जनरल पी.के मिश्रा होरें Ace of Spades Division दे GoC हुंदे कन्नै कल कब्जा रेखा कन्नै लग्गदे अगेत्रे इलाकें दा दौरा लाया ते मौजूदा सुरक्षा हालात ते कारवाइयें सरबन्धी तयारियें दा जायजा लैता।

